

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD BIN HASSAN [PAPAR]

TARIKH : 20.3.2019 (RABU)

SOALAN NO. 15

Tuan Ahmad bin Hassan [Papar] minta **MENTERI PENDIDIKAN** menyatakan apakah pendirian Kerajaan tentang pembaikan sekolah-sekolah daif di Sabah. Berapakah peruntukan yang sudah diturunkan ke Sabah untuk tujuan ini.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa berusaha untuk menyediakan prasarana pendidikan yang kondusif untuk murid dan guru di sekolah di seluruh negara termasuklah di Sabah. Sehingga Februari 2019 naik taraf dan pembanguanan semula sekolah daif di negeri Sabah melibatkan 153 buah sekolah dengan kos berjumlah RM552.1 juta melalui peruntukan pembangunan dan *Private Finance Initiative* (PFI).

Untuk tahun 2018 sahaja, kelulusan untuk menaik taraf 120 buah sekolah daif telah dibuat dengan kos sebanyak RM429 juta. Sehingga 28 Februari 2019 sebanyak 73 buah sekolah telah siap dan telah digunakan manakala baki 47 sekolah lagi masih dalam peringkat pelaksanaan dan dijangka akan siap pada April 2019.

NO. SOALAN : 15

Bagi pelaksanaan tahun 2019, peruntukan sebanyak RM10 juta telah diluluskan melibatkan naik taraf dan pembangunan semula tiga (3) buah sekolah daif di Sabah. Kesemua projek ini akan dilaksanakan oleh pihak JKR secara tender terbuka dan pelaksanaan dijangka bermula secara berperingkat pada Mei 2019. Sekolah-sekolah tersebut adalah:

1. SK Sungai-Sungai, Beluran
2. SK Nibang, Pitas
3. SK Tiong Wido, Tambunan

Proses libat urus bersama-sama Ketua Menteri Sabah dan Menteri Pelajaran dan Inovasi Sabah sentiasa diadakan. KPM mengucapkan tahniah kepada Kerajaan Negeri Sabah atas inisiatif dan usaha berterusan berkomunikasi dengan pihak Kementerian untuk menyelesaikan isu pembangunan pendidikan di Negeri Sabah. Ini dizahirkan melalui siri lawatan YB Menteri Pendidikan ke Sabah dan terkini lawatan ke sekolah-sekolah di kawasan pulau di mana Menteri Pelajaran dan Inovasi Sabah bersama-sama sepanjang lawatan.

Sekian, terima kasih

RJM 45

PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS

PERTANYAAN : LISAN

**DARIPADA : DATO' HAJI ABDUL RAHMAN BIN MOHAMAD
[LIPIS]**

TARIKH : 20 MAC 2019

SOALAN NO. 16

Dato' Haji Abdul Rahman bin Mohamad [Lipis] minta PERDANA MENTERI menyatakan benarkah KHAZANAH ada mempertimbangkan untuk melupuskan sebahagian daripada hartanah dan pelaburan teknologi di luar negara serta rasional pelupusan itu dilaksanakan.

[JPM]

**JAWAPAN: YB DATUK WIRA DR. MD FARID BIN MD RAFIK
MENTERI DI JABATAN PERDANA MENTERI**

Tuan Yang di-Pertua,

Khazanah Nasional Berhad (Khazanah) merupakan Dana Kekayaan Berdaulat (SWF) negara yang tidak menerima sebarang suntikan dana secara berkala daripada sumber luar, tidak seperti Syarikat-syarikat Berkaitan Kerajaan (GLIC) seperti Kumpulan Wang Simpanan Pekerja (KWSP), Permodalan Nasional Berhad (PNB) dan sebagainya.

Sumber pendanaan KWSP adalah caruman daripada kira-kira 7 juta pekerja setiap bulan manakala sumber pendanaan PNB pula adalah daripada rakyat Malaysia yang melabur dalam skim-skim amanah sahamnya. Hasil daripada pelupusan saham Khazanah lazimnya digunakan untuk beberapa tujuan utama:

SOALAN NO: 16

1. Untuk Khazanah membuat pelaburan baharu;
2. Untuk perbelanjaan operasi Khazanah, termasuk mengurangkan hutang Khazanah; dan
3. Untuk Khazanah membayar dividen kepada Kerajaan.

Untuk makluman, pelupusan pegangan-pegangan saham oleh Khazanah adalah aktiviti perniagaan yang lazim dilakukan dan bukanlah perkara baharu. Sebagai contoh, dari 2009 hingga 2017, iaitu semasa pentadbiran Kerajaan sebelum ini, Khazanah telah membuat pelupusan berjumlah RM45.3 bilion. Untuk perbandingan, **pada 2018, jumlah pelupusan Khazanah adalah kira-kira RM3.8 bilion berbanding RM6.4 bilion pada 2017.**

Khazanah akan mempertimbangkan peluang pelupusan aset sebaik sahaja aset tersebut mencapai objektif pelaburan dan pulangan sasarannya. Ini merupakan rasional utama bagi sebarang pelupusan yang dilakukannya.

Setiap satu peluang pelupusan akan dinilai berdasarkan sasaran kewangan dan juga sasaran strategik yang ditetapkan, yang turut bergantung kepada masa dan kekuatan pasaran serta ketersediaan, kualiti dan kredibiliti pembeli, memandangkan pelupusan itu sendiri sememangnya bersifat oportunistik. Justeru itu, sebarang peluang untuk melupuskan aset-aset milik Khazanah, termasuk aset hartanah dan teknologi, akan turut dipertimbangkan dengan cara yang sama iaitu hanya apabila mencapai pulangan dan objektif pelaburannya.

Khazanah tidak dapat menyatakan secara terperinci aset-aset yang bakal dilupuskannya pada tahun kewangan semasa memandangkan ia memerlukan kelulusan pihak tertentu termasuk Lembaga Pengarah serta pihak pengawal selia, baik di dalam mahupun di luar negara, bagi memastikan ia dilaksanakan secara tertib dan teratur serta menurut undang-undang dan peraturan yang ditetapkan.

Sekian. Terima kasih.